

Elvyttää 100 vuotta vanhaa historiata  
"Haaparantalaiset pitävä olla ylpeitä kaupunkin  
historiasta"

## HAAPARANTA

Menhelel viikola aviseerathiin Haaparannanleheessä,  
ette osotelma "Världens Nålsöga-Haparanda 1914–  
1918" jatkuu kolmatta vuotta peräkkää.

Haaparannanlehti oon kohanu Sara Frykmanin,  
aatosmaakeskan ja homman kässäkirjottajan.

Se mitä kaupunkissa oli menheilä ensimmäisen  
mailmansoan aikana oon monele haaparantalaisele  
tuntematonta.

Lanstormi panthiin liikekannale 2. elokuuta 1914 ja  
vaikka Ruotti julisti maan puolueettomaksi soassa niin  
miehet asetethiin ampuma-asheila ja siotethiin pitkin  
väylää.

Kaupunkinvaltuuston puhheenjohtaja piti puhheen ja  
selitti, ette Tornion raja tukithaan ja, ette pankot piain  
panhaan kiini. Tämä keskelä satokorjun ja lohenpyynnin  
aikaa.

– Paikalinen väki pölästy ko se yhtäkkiä oli joutunu  
sothaan, selittää Sara Frykman.

## **Tosikertomus**

Kertomus tältä aijalta rakentuu tosikertomukshiin ja  
perusta oon Frykmanin isän kertomukset. Neulansilmä  
oon ensimmäisen mailmasoan keston mukanen  
viisvuotinen hoito ja kuluva vuosi koskee vuotta 1916.

– Mulle oon tärkeätä saa’ a sen maholisiman toelisuuen toeksi ko kirjotan kässäriä. Se häätyy olla tyypilistä aijale, oikeat ihmiset, ei sovi sekottaa asioita hoithoin, joita ei silloin ollu, selittää Frykman.

Neulansilmän aatos oon lua uteliaisuutta, tietoa ja tietosuuttaa Haaparannasta sen aijanjakson toimipaikkana.

– Haaparannala oon perintö, jota häätyy hoitaa ja haaparantalaiset pitävä olla ylpeitä kaupunkin histuuriasta, sanoo Frykman.

## **Joppausta rannikolla**

Osotelma oli aateltu kestävän 12. ja 14. elokuun välisennä aikana, mutta sitä oon nyt pitenetty maanataiksi, 15. elokuuta, ko saatethaan nähä joppausreisu rannikolla.

Sara Frykman ja paikallinen tuottaja Rebecka Lindgren ei halva paljastaa kaikkea mitä tulhaan osothaan osotuksen aikana, mutta mainittevva joitaki jänniä osia.

– Met näytämä tositapahtunheita joppausjuttuja kolmesta eri joppausjutusta osottamalla ja niihin sekkaintuu haaparantalaisia, Frykman selittää.

Nythään jutut oon preskripeeratut niin kyllä niittä saattaa osottaa uuesthaan.

## **Kahvia konjakkinheen**

Tuttuja hahmoja menheiltä vuosilta tulee kans takasi. Frouva Ström, joka menheenä vuona joutu panheen kahvelan kiini ko paljastethiin, ette se oli ollu lain- ja

järjsetyksenvastanen Haaparannan kaupunkissa, ko oli maholisuuksia ostaa ”tuplat kahvit” kahvelassa.

– Se oli sekottannu väkeviä juomia kahviin, mutta toistukset häntä vasthaan ei olheet riittäviä niin se saapi auasta taas kahvelan, sannoo Frykman.

Sen lisäksi nähään akenttia, spiunia ja polševiikkiä.

– Ja meekatähtiä, selittää Frykman.

Bildtext: Haaparannanlehti kohtasi Sara Frykmania, Neulansilmän aatosmaakeskaa ja kässäkirjottajaa ja kans Rebecka Lindgreniä, tapahtuman tuottajaa.

Haaparannan kaupunkinhotelilla oli keskheinen sia ensimmäisen mailmansoan aikana, täälä kakkosroikka istuu perinerikhaassa fiinissä salissa.

Meänkielennös: Bengt Pohjanen

EKALE: Ensimmäistä mailmansottaa toistethaan